



Urs Cadruvi, secretari general LR, Sina-Mara Hassler, promotura regionala LR, Sutselva, Carmen Dedual, manadra Regiuns LR.

FOTO M. NUTT PHOTOGRAPHY

La LR ha inaugurrà ses nov domicil en Sutselva

■ (cp) Ils 6 d'october 2015 ha la Lia Rumantscha (LR) inaugurrà a chaschun d'in apero ses nov domicil en Sutselva en il Center da Capricorns a Vargistagn. Cun la midada da Ziràn a Vargistagn s'intensivescha la collavuraziun cun il Center da Capricorns, il Parc natiral Beverin e la scola auta turitgaisa per ciencias applitgadas.

La LR en Sutselva chatt'ins da nov en il Center da Capricorns a Vargistagn. Passa 30 persunas han inaugurrà ensemen cun la LR la nova localitad. La midada da Ziràn a Vargistagn ha ina raschun –

il Center da Capricorns cun ustaria ed hotel è in lieu d'inscunter ed il domicil da las suandantas organisaziuns: Fundaziun Capricorn, secretariat dal Parc natiral Beverin, ZHAW (scola auta turitgaisa per ciencias applitgadas), il Post da cumpetenza dal Grischun per in turissem en accord cun la natira e la cultura e l'exposiziun da capricorns cun infurmaziuns davart il Parc natiral Beverin. Tut questas instituziuns permettann a la LR d'organisar e d'intensivar da maniera simpatica inscunters per indigens e novarrivads.

Biro, butia, lieu d'inscunter e da contacts

Il nov domicil en il Center da Capricorns n'è betg mo in biro. La nova promotura regionala da la LR per la Sutselva, Sina-Mara Hassler, po era preschentar en las novas localitads ils divers products da la LR. Ultra da quai vul ella intensivar ils contacts tranter Rumantschs e na-Rumantschs, organisar scuntradas e Cafés Rumantschs en la regiun e tgirar ils contacts cun la scola ed ils projects surregiunals sco per exempel l'occurrè da scriver «Plima d'aur».